



Adresa: Ul. Hamdije Čemerlića 39.
71000 Sarajevo
<http://www.voda.ba>

tel. +387 33 726-422
fax. +387 33 726-423
e – mail: info@voda.ba

Broj: **UP-I/25-2-40-049-5/18**

Datum: 12.08.2021. godine

„Agencija za vodno područje rijeke Save“ Sarajevo rješavajući po zahtjevu pravnog lica „Vodovod Vrelo“ d.o.o. Gradačac za izdavanje vodne saglasnosti na izrađenu projektnu dokumentaciju za aktivnost zahvatanja dodatnih količina vode na vodocrpilištu „Vrelo“, lokalitet Mionica, općina Gradačac, na osnovu člana 109. stav (1) tačka 1. Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98 i 49/99), donosi

RJEŠENJE **o vodnoj saglasnosti**

1. Pravnom licu „Vodovod Vrelo“ d.o.o. Gradačac daje se vodna saglasnost na izrađenu projektnu dokumentaciju za aktivnost zahvatanja dodatnih količina vode na vodocrpilištu „Vrelo“, lokalitet Mionica, općina Gradačac, na zemljištu označenom kao parcele k.č. 3355 K.O. Gradačac 1, Grad Gradačac, u skladu sa projektnom dokumentacijom:
 - Projekat detaljnih hidrogeoloških istraživanja za potrebe zahvatanja dodatnih količina podzemnih voda u izvorištu „Vrela“ - Mionica, Općina Gradačac, urađen od strane „Ipin“ d.o.o. Bijeljina, novembar 2015. godine
2. Vodna saglasnost se daje na osnovu utvrđenog činjeničnog stanja i pregleda investiciono-tehničke dokumentacije iz tačke 1. ovog Rješenja koja je sastavni dio ovog rješenja i ista se ovjerena od strane ove Agencije vraća investitoru na trajno čuvanje u skladu sa odredbom člana 114. stav (3) Zakona o vodama.
3. Vodna saglasnost se daje pod slijedećim uslovima:
 - 3.1. Vodozahvatni objekat – bunar sa svim ugradbenim elementima, opremom i pratećim objektima izvesti u skladu sa ovjerenom projektnom dokumentacijom iz tačke 1. dispozitiva ovog Rješenja.
 - 3.2. Način i mjesto ugradnje mjerača protoka zahvaćene vode i pumpnih agregata kao i održavanje istih uskladiti sa upustvima datim od strane proizvođača opreme.
 - 3.3. Obezbijediti ateste za svu opremu koja se planira ugraditi u vodozahvatni objekat i pumpnu stanicu (fazonski komadi i armature, vodomjeri, pumpni agregati i sl.).
 - 3.4. Korisnik vodne saglasnosti je dužan da riješi imovinsko-pravne odnose na lokalitetu izvođenja radova na mjestu formiranja privremenog gradilišta, pristupnog puta i deponije za odlaganje viška izvađenog materijala.
 - 3.5. U toku izvođenja radova, neophodno je poduzeti sve potrebne mjere zaštite, da predmetnim aktivnostima ne dođe do nastanka štete ili nepovoljnih posljedica po vode i vodni režim.

- 3.6. Prilikom izvođenja radova treba koristiti opremu i mašine koje su tehnički ispravne, bez curenja tečnih goriva, maziva, hidrauličkih ulja i sl.
- 3.7. Predvidjeti da se sav nastali otpad prilikom izvođenja radova prikuplja u skladu sa važećim propisima o postupanju sa otpadom.
- 3.8. Podnosilac zahtjeva je obavezan uvažiti uslove iz: Rješenja o urbanističkoj saglasnosti broj: 12-04/1-23-035523/15 od 03.02.2016. godine izdatog od strane Ministarstva prostornog uređenja i zaštite okolice Tuzlanskog kantona.
- 3.9. Sve kolizije sa postojećim instalacijama (elektroenergetske, telefonske i ostale infrastrukture) na lokaciji vodozahvatnog objekta, ukoliko do takvih situacija tokom izvođenja radova dođe, će se rješavati uz saglasnost mjesnog nadležnog preduzeća, koje će dati tehničke uslove za izvođenje ovih radova.
- 3.10. Planom organizacije gradilišta koje će se formirati u funkciji provođenja navedenih radova, treba osigurati da mjesta za smještaj građevinske mehanizacije, tečnih goriva i maziva budu locirana na takvoj udaljenosti da ne mogu imati negativan uticaj na podzemni akvifer (izvorište).
- 3.11. Ukoliko se cisterne i rezervoari s gorivom planiraju postaviti na gradilištu, iste je potrebno postaviti u prihvatne posude ili izvesti s dvostrukom stjenkom prema posebnim propisima i izvan zone uticaja na površinske i podzemne vode.
- 3.12. U okviru gradilišta riješiti prikupljanje i konačnu dispoziciju sanitarno-fekalnih otpadnih voda na način da se iste prikupe u vododržive posude/rezervoare i izvezu izvan zona izvođenja radova uz ugovor sa nadležnim komunalnim preduzećem.
- 3.13. U sklopu uređenja gradilišta dati organizaciju izvođenja radova uz opis i instrukcije u slučaju pojave incidentnih situacija i način sanacije njihovih negativnih posljedica.
- 3.14. Investitor (korisnik vodne saglasnosti) je u obavezi da angažuje stručno lice sa osnovnim zadatkom kontinuiranog nadzora (praćenja i kontrole) nad provođenjem projektovanih aktivnosti na terenu.
- 3.15. Višak materijala iz iskopa koji će se pojaviti prilikom izvođenja zemljanih radova, a koji ne bude iskorišten za radove na izgradnji objekta zahvata pitkih voda, potrebno je odložiti na deponiju izvan vodnog dobra, a sve u skladu sa uputama Investitora, tj. korisnika ove vodne saglasnosti.
- 3.16. Tehnologiju izvođenja radova prilagoditi uslovima na terenu uz odgovarajuća osiguranja ljudi i materijalnih dobara i uz praćenje stanja na izvorištu u smislu promjene kvaliteta i količina voda.
- 3.17. Ukoliko se u toku izvođenja radova i korištenja predmetnih objekata prouzrokuju štetne promjene režima voda i to prouzrokuje štete trećim licima, podnosilac zahtjeva je obavezan uzroke štete otkloniti, a nastalu štetu trećim licima nadoknaditi.
- 3.18. Investitor je obavezan pridržavati se svih mjera i uslova, propisanih u ovoj vodnoj saglasnosti i saglasnostima izdatim od strane drugih nadležnih organa.
4. Nakon završetka aktivnosti na terenu neophodno je isti dovesti u prvobitno stanje.
5. U periodu do ishodovanja upotrebne dozvole uraditi Elaborat o zonama sanitarne zaštite izvorišta na osnovu koga će nadležni organ iz člana 68. Zakona o vodama donijeti Odluku o zaštiti izvorišta „Vrelo“ -Mionica, Grad Gradačac, a sve u skladu sa važećim Pravilnikom o načinu utvrđivanja uslova za određivanje zona sanitarne zaštite i zaštitnih mjera za izvorišta voda za javno vodosnabdijevanje ("Službene novine Federacije BiH", br. 88/12).
6. Po završetku izgradnje predmetnog objekta i obavljenog tehničkog pregleda izvedenih radova, korisnik vodne saglasnosti dužan je podnijeti zahtjev za izdavanje vodne dozvole. Zahtjev se dostavlja u skladu sa članom 12. i 19. Pravilnika o sadržaju, obliku, uslovima, načinu izdavanja i čuvanja vodnih akata („Sl.novine FBiH“ broj: 31/15, 55/19, 41/20).
7. Ova vodna saglasnost, shodno članu 114. stav 6. Zakona o vodama, prestaje da važi istekom roka od dvije godine od dana pravosnažnosti ovog Rješenja ukoliko do tog dana nije

pribavljeno odobrenje za građenje i započeta izgradnja objekata u skladu sa projektom iz tačke 1. dispozitiva ovog rješenja.

8. Ovo Rješenje o vodnoj saglasnosti može se izmjeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

O b r a z l o ž e n j e

Investitor „Vodovod Vrelo“ d.o.o. Gradačac pismenim zahtjevom bez broja zaprimljenim dana 29.01.2018. godine zatražio je izdavanje Rješenja o vodnoj saglasnosti na izrađenu projektnu dokumentaciju za aktivnost zahvatanja dodatnih količina vode sa vodocrpilišta „Vrelo“ lokalitet Mionica, Grad Gradačac, na zemljištu označenom kao parcela k.č. 3355 K.O. Gradačac 1, Grad Gradačac, a u postupku pribavljanja odobrenja za gradnju. U provedenom postupku, uz zahtjev za izdavanje vodne saglasnosti dostavljena je slijedeća dokumentacija:

A. Opća dokumentacija

- Rješenje o upisu subjekta u sudski registar, broj:U/I-2025/05 od 13.12.2005. godine izdat od strane Općinskog suda u Tuzli – ovjerena kopija,
- Rješenje o registraciji, broj:032-0-Reg-11-002274 od 13.01.2012. godine izdat od strane Općinskog suda u Tuzli – ovjerena kopija,
- Uvjerenje o poreznoj registraciji od 20.12.2005. godine izdato od strane Porezne uprave-Kantonalni ured Tuzla – ovjerena kopija,
- Uvjerenje o registraciji/upisu u Jedinstveni registar obveznika indirektnih poreza, broj:04/1-UPP/1-8942/07 od 31.08.2007. godine izdato od strane Uprave za indirektno-neizravno oprezivanje Banja Luka – ovjerena kopija,
- Kopija lične karte izdata od strane MUP TK Gradačac od 22.08.2014. godine na ime Mujić Mirsad,
- Rješenje o prethodnoj vodnoj saglasnosti, broj:UP-I/25-1-40-186-5/16 od 15.04.2016. godine izdata od strane Agencije za vodno područje rijeke Save, Sarajevo – kopija,
- Rješenje o urbanističkoj saglasnosti, broj:12-04/1-23-035523/15 od 03.02.2016. godine izdato od strane Ministarstva prostornog uređenja i zaštite okolice Tuzlanskog kantona – kopija,
- Izvod iz prostornog plana Tuzlanskog kantona 2005-2025. godina, broj:12-04/1-23-035523/15 od 03.02.2016. godine izdat od strane Ministarstva prostornog uređenja i zaštite okolice Tuzlanskog kantona K– kopija,
- Rješenje, broj:05-18-73/16 od 24.05.2016. godine izdato od strane Federalnog ministarstva energije, rudarstva i industrije – kopija,
- Rješenje o vodnoj dozvoli za zahvat vode, broj:UP-I/25-3-40-056-5/14 od 10.03.2014. godine izdata od strane Agencije za vodno područje rijeke Save, Sarajevo- kopija,
- Rješenje o okolinskoj dozvoli, broj:12/01-1-23-11610/14 od 14.10.2014. godine izdato od strane Ministarstva prostornog uređenja i zaštite okolice Tuzlanskog kantona – kopija,
- Količine zahvaćene vode iz bunara GM1 i GM2 sa izvorišta Vrelo u Mionici – kopija,
- Zapisnik o izvršenom obilasku terena u postupku izdavanja rješenja o vodnoj dozvoli, broj:UP-I/25-3-40-056-3/14 od 05.03.2014. godine – kopija,
- Izjava, broj:25/21-vs od 10.08.2021. godine izdata od strane „Vodovod Vrelo“ d.o.o. Gradačac – kopija,
- Izvod iz Službenog Glasnika općine Gradačac, Odluka o vodosnabdijevanju na području općine Gradačac, broj: 2/2008. godine – kopija,

- Ugovor o koncesiji, broj:16-13/14/15 od 03.09.2015. godine potpisan sa Ministarstvom poljoprivrede, šumarstva i vodoprivrede Tuzlanskog kantona – kopija,
- Odluka o zaštiti izvorišta „Vrelo“ -Mionica, Grad Gradačac, broj:01-04-146/20 od 25.06.2020. godine donesena od strane Gradskog vijeća Grada Gradačca – kopija,
- Dokaz o uplaćenju upravnoj pristojbi i administrativnoj taksi na zahtjev.

B Tehnička dokumentacija

- Projekat detaljnih hidrogeoloških istraživanja za potrebe zahvatanja dodatnih količina podzemnih voda u izvorištu „Vrelo“ -Mionica, Općina Gradačac urađen od strane „Ipin“ d.o.o. Bijeljina, novembar 2015. godine,
- Elaborat o izvedenom bunaru GM3 na izvorištu Vrelo MZ Mionica, Općina Gradačac urađen od strane „Ipin“ d.o.o. Bijeljina, decembar 2017. godine

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

U provedenom postupku konstatovano je sljedeće:

- Investiciono tehnička dokumentacija navedena u tački 1. dispozitiva Rješenja urađena je u skladu sa uslovima iz rješenja o prethodnoj vodnoj saglasnosti broj:UP-I/25-1-40-186-5/16 od 15.04.2016. godine izdatog od strane Agencije za vodno područje rijeke Save, Sarajevo.

- Urbanističko-tehničke uslove za izgradnju vodozahvatnog objekta-bunara, podnosiocu zahtjeva je kroz izdato Rješenje o urbanističkoj saglasnosti propisalo Ministarstvo prostornog uređenja i zaštite okolice Tuzlanskog kanton, broj:12-04/1-23-035523/15 od 03.02.2016. godine.

- Nakon prijema ovog zahtjeva Agencija je pismenim putem obavještena da je pokrenut postupak kod Općinskog suda u Tuzli između novoformirane firme i pravnog lica „Vodovod Vrelo“ d.o.o. Gradačac. Po primitku navedenog obavještenja obustavljene su sve pravne radnje do okončanja sudske institucije ne riješe prethodna pitanja tj. vlašnički i upravljački odnosi i prava koja iz njih proističu.

Obavještenje o okončanju predmetnog sudskog postupka nije dostavljeno ovom organu, ali su utvrđene sljedeće činjenice:

- Obzirom da je: vodozahvatni objekat- bunar GM 3 izgrađen na terenu, da je u funkcionalnom stanju, da iz njega kontinuirano crpi voda za piće za potrebe vodosnabdijevanja lokalnog stanovništva, da je urađen Elaborat o zaštiti izvorišta, da je od strane Gradskog vijeća Grada Gradačca dana 25.06.2020. donesena Odluka o zaštiti izvorišta „Vrelo“, odučeno je da se ispoštuje procedura sa pravne strane tj. izda Rješenje o vodnoj saglasnosti.

- „Vodovod Vrelo“ d.o.o. Mionica-Centar, Gradačac potpisalo je Ugovor o koncesiji za korištenje vode za javno vodosnabdijevanje vodom naseljenih mjesta Mionica I, Mionica II, Mionica Centar, dijela MZ Bagdale-Ahmetaši i dijela MZ Tramošnica- Gornje Liporašće, Općina Gradačac, broj:16-13/14/15 od 03.09.2015. godine sa Ministarstvom poljoprivrede, šumarstva i vodoprivrede Tuzlanskog kantona. Ugovor o koncesiji je potpisan na period od 20 godina, a u Službenom Glasniku Gradačca, Odluka o vodosnabdijevanju na području općine Gradačac, broj:2/2008 u članu 15. stav (2) stoji da: „Grupni i mjesni vodovodi ili javni bunari daju se na upravljanje i korištenje pravnom licu kojem je na osnovu Zakona o koncesijama dodijeljena koncesija.“ Uz uvažavanje svih prethodnih nepobitnih činjenica Agencija je odlučila da izda ovo Rješenje o vodnoj saglasnosti pravnom licu „Vodovod Vrelo“ d.o.o. Gradačac.

Gore navedene činjenice ukazuju da donošenjem ovakvog rješenja neće biti narušeno načelo zaštite legitimnih očekivanja, a što je usko povezano s načelom zaštite stečenih prava te također predstavlja jedan od aspekata načela pravne sigurnosti te da se novim rješenjem ne uskraćuje pravo na vodu, kao jedno od temeljnih ljudskih prava.

Na osnovu dostavljene dokumentacije i utvrđenog činjeničnog stanja, a u cilju smanjenja negativnih uticaja predmetnih objekata i aktivnosti na stanje voda i vodni režim, podnosiocu zahtjeva su ovom vodnom saglasnosti, u dispozitivu Rješenja propisani uslovi u skladu sa članom 114. Zakona o vodama i članom 7. Pravilnika o sadržaju, obliku, uslovima, načinu izdavanja i čuvanja vodnih akata koje je Investitor dužan ispuniti u toku gradnje sistema za zahvatanje novih količina vode za piće.

U skladu sa svim navedenim konstatovano je da sa aspekta sektora voda i priložene dokumentacije nepostoje zapreke da se Investitoru izda tražena vodna saglasnost za navedene aktivnosti, pa je riješeno kao u dispozitivu ovog rješenja.

Podnosilac zahtjeva je uplatio upravnu taksu u iznosu od 60 KM u skladu sa članom 7. stav 1. tarifni broj 43. Zakona o federalnim upravnim taksama („Službene novine F BiH“, broj 6/98, 8/00, 45/10, 43/13).

Uputa o pravnom lijeku

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva u roku od 15 (petnaest) dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.


Voditelj postupka:

mr. sci. Selma Merdan, dipl.inž.geol.

Prilog: (Tehnička dokumentacija navedena pod tačkom B obrazloženja Rješenja, (alineja 1-ovjerena)

Po ovlaštenju

Rukovodilac sektora za izdavanje vodnih akata


Haris Ališehović, dipl.inž.grad.

Dostaviti:

- „Vodovod Vrelo“ d.o.o. Gradačac
- Mionica Centar bb, 76250 Gradačac, (sa priložima),
- AVP-ISV -Vodna knjiga,
- Sektor 40, arhiva,
- Oglasna tabla AVP-Sava Sarajevo